

GIK MAKELO DHI MABER





"To bed mana gi chir,
kendo gi jing'o, kiluwo
chik duto mane Musa
jatichna omiyi. Kik iwe
chikno, kibaro
koracham kata
korachwich, mi inibed
gi hawi kuonde duto
midhiye" Joshua 1:7



Bang' higni 40 mag wuotho, anyuola manyien osewuok, kendo kinde osehopo mar kawo Piny Singruok. Musa osetho, kendo Nyasaye oseyiero jatelo manyien mondo otim tijni: Joshua.

Kapok gichako locho, jatelo manyien kod tieng' manyien duto oluongi mondo oket geno chuth kuom Nyasaye.

Kaka tieng' ma sani (wan) ochung' e tong' Kanaan mar polo, luong mar Nyasaye pod winjore gi teko: "Bed mana gi chir, kendo gi jing'o" (Josh. 1:7).



Weche motelo (Joshua 1:1-3):



Musa gi Joshua



Migepe mag kitabuni



Tij Joshua (Joshua 1:4-9):




Cham giken i mosingi



Chir kod jing'o



Ber mar tichne





WECHE MOTELO (JOSHUA 1:1-3)

MUSA KOD JOSHUA

"Kane Musa jatich Ruoth Nyasaye osetho, Ruoth Nyasaye nowacho ni Joshua wuod Nun, mane jalup Musa niya," (Joshua 1:1)

E sura mokwongo mar Joshua, uluong nyingg Musa nyadipar gachiel, kendo nyinge yudore dimang'eny e bugno duto.

Nitie gik mang'eny ma chalre e kind jotelo ariyogo:



Kata obedo ni sura mokuongo mar Joshua wuoyo kuom lokruok mar telo e kind jotelo ariyo madongogi, kata achiel kuomgi ok en ng'at ma lich e kitabuni. Jal malich kae ahinya en Ruoth Nyasaye owuon, ma wechene ema kwongo e kitabuni kendo wechenego ema tayo okenge duto. Kuom mano, nenore maler ni jatend Israel hie ne en ng'a.



**Nyasaye
nofwenyorenegi
(Wuok 3:2-4; Josh. 5:13-14)**



**Nonyisgi ni gilony
wuochehi
(Wuok 3:5 ; Josh. 5:15)**



**Nyasaye nosingo ni
nobed kodgi (Wuok 3:12;
Josh. 1:5)**



**Ne gitimo nyasi mar
Pasaka
(Wuok 12:21-23; Josh. 5:10)**



**Ne gikalo e pi e piny
motwo
(Wuok 14:21-22; Josh. 3:14-17)**



**Mana nobiro gi achiel, to
norumo gi machielo
(Wuok 16:4-5, 31; Josh. 5:11-12)**



**Ne giro jombetre odhi
ocheng piny
(Kwan 13:1-3; Josh. 2:1)**



“Koro Joshua ne ong’ere kaka jatelo mar Israel. Ne ong’ere ahinya kaka jalweny, kendo michne kod timbene mabeyo ne nigi nengo ahinya e kindeni e sigana mar ogandane. Ne en ng’at ma jachir, mane ochung’ motegno, kendo jakinda, mane timo gik moko mapiyo, mane ok kaw asoya, mane ok par mana gik mobiro yudo kuom joma omiye mondo oriti, kendo molooyo gik moko duto, ne omiye roho mar yie mangima kuom Nyasaye—mano e kido mar ng’at mane oyier gi Nyasaye mondo otelne jolwenj Israel e donjogi e Piny Mosingi. E kinde ma ne gidak e thim, ne en kaka jalup Musa, kendo kuom muolo mare kendo bedo motegno, bedo motegno e kinde ma jomoko ne bagni, bedo motegno mar rito adier e kind gik ma ne nyalo kelo luoro, ne omiyo nenore ni owinjore mondo okaw kar Musa, kata kapok oluonge gi dwol mar Nyasaye mondo okaw telono.”

MIGEPE MAG KITABUNI

“Musa jatichna osetho. Omiyo ikri gi jo-Israel duto mondo ung’ad aora Jordan, udhi e piny mamiyou” (Joshua 1:2)

Kitap Joshua nyiso chopo singo ma Nyasaye nosingo ne jo-Israel kane ogologi piny Misri, tiende ni, ne obiro miyogi piny Kanaan. Giduto, weche motelo (sura mar 1) kod kitabuno owuon opogi e migepe ang’wen madongo:

NG’AD idhi Kanaan

Joshua 1:1-9

Joshua 1:1-5:12

KAW Kanaan

Joshua 1:10-11

Joshua 5:13-12:24

POG piny





Joshua 1:12-15

Joshua 13:1-21:45

TICH kokalo kuom winjo Chik

Joshua 1:16-18

Joshua 22:1-24:33





TIJ JOSHUA

(JOSHUA 1:4-9)



CHAM GIKENI MOSINGI

"Kamoro amora ma tiendu onyono, nobed maru, kaka nasingora ni Musa"
(Joshua 1:3)


E Joshua 1:3, Nyasaye wuoyo e yor ranyisi mar kinde ma kawuono. Owuoyo kuom piny Kanaan mana ka gimane osemye Israel chon. Mano nyiso ni Nyasaye ne omiyogi adier chuth nine gidhi loyo lwenyno.

Bang'e, oparonegi kuonde ma lochno biro chope (Josh. 1:4): koa aora Jordan (e wuokchieng') kod Nam Mediteranea (e podho chieng'), kowuok e thim (e piny ma milambo) nyaka e aora Efrate (e nyandwat).



Bang'e, olokore ir Joshua kendo onyise ni ka en gi chir kod jing'o, onge ng'at ma biro nyalo chung' e nyime (Joshua 1:5-6).

To loch ne ok ni kuom tich matek mar Joshua, ne en kuom Nyasaye. Ne omiye geno, kaka omiyowa geno ng'ato ka ng'ato kuomwa: "Anabed kodi" (Josh. 1:5; Mt. 28:20).



CHIR KOD JING'O

"Par kaka asechiki ni mondo ibed gi chir kendo gi jing'o. Kik iluor kendo kik chunyi nyosre, nikech an Ruoth Nysaye ma Nyasachi, an kodi kuonde duto midhiye." (Joshua 1:9)



Kapok okwayo Joshua mondo obed gi chir kod jing'o e lweny (Josh. 1:9), Nyasaye nokwaye mondo obed gi chir kod jing'o e luwo Chik (Josh. 1:7).

Mano bende en gima timore e kindegi. Nyasaye kwayowa mondo watem matek mondo warit chikne (Fweny 14:12). Mano dwaro ni wabed gi chir motegno.

Kor ka kore, osingo ni "an kodi kuonde duto midhiye" (Josh. 1:9), okonyowa mondo waked lweny ma wantie. Ok en lweny mar ringruok, to "wakedo gi joloch gi joma nigi teko, kod ruodhi mag piny motimo mudhoni, kaachiel gi lang chunyi maricho ma ok mag pinyini" (Efes 6:12). Mondo watim kamano, osekiwa gik ma dwarore (Efes. 6:13-17).

Gima nyalo konyowa mondo wabed gi loch en geno Nyasaye chuth. Kendo mondo watim kamano, dwarore ni wabed gi winjruok kode ndalo ka ndalo (Efes. 6:18).



BER MAR TICHNE


"Kik wiya wil gi Kitap Chikno, to nyaka isome odiechieng' gotieno, kendo ine ni iluwo chik duto mondikie. Eka inidongi, kendo noguedh gik moko duto mitimo." (Joshua 1:8)



Dhi maber kaluwore gi kaka Nyasaye neno ok chalre gi dhi maber kaka dhano neno. Dhi maber mar pinyni inyalo yudo kuom ketho chike mag Nyasaye kod mag dhano, to loch mar adier kendo ma nyaka chieng' ok nyal (Josh. 1:8).

Wabiro bedo gi ngima maber ka waluwo chike kod timbe ma yudore e Chik Nyasaye. To mano donge en warruok kuom tich?

Ok kamano. Yie kod Chik ok gin gik ma ok nyal winjore, to gin gik ma konyore (Rumi 3:31). Ka wawuoyo kuom Chik, wawuoyo kuom yo ma owinjore wadakgo, to ok yo ma wayudogo warruok. Winjruok marwa gi Nyasaye nenore kuom winjo dwaro mare.



“Kinde duto Jakristo nigi jakony motegno ma en Ruoth. Yo ma Ruoth konyogo nyalo bedo ni ok wang’eyo; to gima wang’eyo en niya: Ok nowe jogo moketo genogi kuome. Kapo ni Jokristo ne nyalo ng’eyo kar kwan ma Ruoth osehike yoregi, ni mondo dwaro mar jasigu kuomgi kik ochop kare, ok di gidhach adhacha gi wuoth ka ging’ur. Yiegi disiki kuom Nyasaye, kendo onge tem moro amora ma nigi teko manyalo gologi kuome. Giyie ni en e rieko kod nyalo margi, kendo odhi miyo gima odwaro timo kokalo kuomgi timore.”